



15
2309
PB:15

Bosnia and Herzegovina
Federation of Bosnia and Herzegovina
CANTON SARAJEVO
Government

Broj: 02-04-53581-1/25
Sarajevo, 14.11.2025. godine

Na osnovu člana 26. i 28. stav (4) Zakona o Vladi Kantona Sarajevo („Službene novine Kantona Sarajevo“, broj: 36/14 - Novi prečišćeni tekst i 37/14 - Ispravka) Vlada Kantona Sarajevo, na **132.** vanrednoj sjednici održanoj **14.11.2025.** godine, donijela je

ZAKLJUČAK

1. Prihvata se Izjašnjenje Ministarstva pravde i uprave Kantona Sarajevo na zastupničku inicijativu zastupnice u Skupštini Kantona Sarajevo Jelene Pekić, broj: 03-04/2-04-43147-2/25 od 10.11.2025. godine.
2. Izjašnjenje iz tačke 1. ovog zaključka dostavlja se Službi za skupštinske poslove Skupštine Kantona Sarajevo, na daljnje postupanje.
3. Ovaj zaključak stupa na snagu danom donošenja.



Dostaviti:

1. Predsjedavajući Skupštine Kantona Sarajevo,
2. Zamjenici predsjedavajućeg Skupštine Kantona Sarajevo (3x),
3. Premijer Kantona Sarajevo,
4. Ministarstvo pravde i uprave Kantona Sarajevo,
5. Služba za skupštinske poslove Skupštine Kantona Sarajevo,
6. Evidencija,
7. Arhiva.





Broj: 03-04/2-04-43147-2/25
Sarajevo, 10.11.2025. godine

VLADA KANTONA SARAJEVO
g. Nihad Uk, premijer

**PREDMET: Izjašnjenje na zastupničku inicijativu zastupnice u Skupštini
Kantona Sarajevo Jelene Pekić, dostavlja se -**
VEZA: Vaš akt, broj: 16-04-31603-23/25 od 18.08.2025. godine

Stručna služba Vlade Kantona Sarajevo je aktom broj: 16-04-31603-23/25 od 18.08.2025. godine Ministarstvu pravde i uprave dostavila na dalje postupanje Zastupničku inicijativu zastupnice u Skupštini Kantona Sarajevo Jelene Pekić (u daljem tekstu: zastupnička inicijativa) koja je upućena 07.08.2025. godine.

Zastupničkom inicijativom je traženo „da se pristupi izradi propisa kojim će se regulisati uslovi i način sticanja statusa udruženja i fondacija od posebnog interesa za Kanton Sarajevo.“.

U obrazloženju inicijative se navodi:

„Upućujem inicijativu prema Vladi Kantona Sarajevo da u okviru svojih nadležnosti pristupi izradi propisa kojim će se jasno definisati uslovi, kriteriji i postupak za sticanje statusa udruženja i fondacija od posebnog interesa za Kanton Sarajevo, kao i prava i obaveze koje iz tog statusa proizilaze. Gradovi i opštine već imaju regulisan ovaj institut kroz odluke ili pravilnike, čime su omogućili jasnije planiranje i efikasniju dodjelu javnih sredstava udruženjima i fondacijama koje svojim djelovanjem doprinose razvoju lokalne zajednice i ostvarivanju javnog interesa u oblastima socijalne zaštite, kulture, sporta, obrazovanja, ljudskih prava i drugim. S obzirom na to da Kanton Sarajevo nema propis koji uređuje ovu oblast na kantonalnom nivou, neophodno je uspostaviti transparentan, objektivan i inkluzivan mehanizam za priznavanje posebnog statusa, koji će omogućiti strateški pristup podršci civilnom sektoru i racionalnije upravljanje budžetskim sredstvima. Ovdje naročito naglašavam podršku organizacijama civilnog društva u segmentu institucionalne podrške (a koja uključuje troškove režija, zakupa poslovnog prostora, plata radnika), te adekvatnijeg omjera raspodjele sredstava u odnosu na podršku za direktne projektne aktivnosti. Predlažem da se kroz proces izrade propisa konsultuju relevantna udruženja, fondacije, stručna i akademska zajednica, kao i Grad i opštine u Kantonu Sarajevo.“.

S tim u vezi, ovo ministarstvo dostavlja sljedeće izjašnjenje:

S obzirom na to da se zastupnička inicijativa odnosi na donošenje općeg propisa kojim bi se utvrdili uslovi i način sticanja statusa od posebnog interesa za Kanton Sarajevo za udruženja i fondacije koje djeluju u oblastima iz nadležnosti više resornih ministarstava (socijalna zaštita, kultura, sport, obrazovanje, boračka pitanja i dr.), Ministarstvo pravde i uprave je uputilo svim ministarstvima Kantona Sarajevo zahtjev za dostavljanje izjašnjenja na zastupničku inicijativu sa aspekta njihove nadležnosti, a u cilju pripreme sveobuhvatnog odgovora na zastupničku inicijativu.

Izjašnjenja su dostavili Ministarstvo za rad, socijalnu politiku, raseljena lica i izbjeglice, Ministarstvo za boračka pitanja, Ministarstvo za odgoj i obrazovanje i Ministarstvo unutrašnjih poslova. kako slijedi:

Ministarstvo za rad, socijalnu politiku, raseljena lica i izbjeglice dostavilo je izjašnjenje, broj: 13-05/1-04-43147-5/25 od 29.09.2025. godine u kojem se navodi da se sa pozicije tog ministarstva finansiraju sljedeća udruženja od posebnog interesa za Kanton Sarajevo:

1. Udruženje građana „Civilne žrtve rata“ Kantona Sarajevo - na osnovu Zaključka Skupštine Kantona Sarajevo, broj: 01-05-13556/18 od 04.04.2018. godine kojim je prihvaćena inicijativa zastupnika u Skupštini Kantona Sarajevo Rasima Smajića, da se ovo udruženje vrati na finansiranje iz Budžeta Kantona Sarajevo kao što je bilo 2016. godine;
2. Udruženje porodica i djece i osoba sa poteškoćama u razvoju „Dajte nam šansu“ - na osnovu Zaključka Skupštine Kantona Sarajevo, broj: 01-04-15586-4/20 od 16.06.2020. godine kojim se prihvata inicijativa da se ovo udruženje uvrsti na budžetsku poziciju Ministarstva za rad, socijalnu politiku, raseljena lica i izbjeglice na poziciji tekućih grantova za podršku rada neprofitnim organizacijama, kako bi se održao i podržao rad servisnih centara Udruženja, koji su od velikog značaja za Kanton Sarajevo;
3. „Udruženje Srce za djecu koja boluju od raka u Federaciji Bosne i Hercegovine, roditelja i prijatelja djece oboljele i liječene od malignih bolesti Sarajevo“ - na osnovu Odluke Skupštine Kantona Sarajevo o proglašenju "Udruženja Srce za djecu koja boluju od raka u Federaciji Bosne i Hercegovine, roditelja i prijatelja djece oboljele i liječene od malignih bolesti Sarajevo" od posebnog interesa za Kanton Sarajevo („Službene novine Kantona Sarajevo“, broj 48/23);
4. „Udruženje roditelja ubijene djece Sarajeva 1992.-1995.“ – na osnovu Odluke Skupštine Kantona Sarajevo o proglašenju „Udruženja roditelja ubijene djece Sarajeva 1992.-1995.“ udruženjem od posebnog interesa za Kanton Sarajevo („Službene novine Kantona Sarajevo“, broj 8/24);
5. Udruženje za podršku porodicama sa djecom i osobama sa poteškoćama u razvoju „Colibri“ – na osnovu Odluke Skupštine Kantona Sarajevo o proglašenju Udruženja za podršku porodicama sa djecom i osobama sa poteškoćama u razvoju "Colibri" udruženjem od posebnog interesa za Kanton Sarajevo („Službene novine Kantona Sarajevo“, broj 8/24).

U svom izjašnjenju Ministarstvo za rad, socijalnu politiku, raseljena lica i izbjeglice navodi da, uzimajući u obzir značaj koji navedena udruženja imaju za građane Kantona Sarajevo, kroz omogućavanje aktivne, trajne i cjelovite podrške djeci oboljeloj od raka i njihovim porodicama, podršku porodicama sa djecom i osobama sa poteškoćama u razvoju te njegovanje sjećanja na djecu ubijenu u Sarajevu u periodu 1992. do 1995. godine, kao i ostale civilne žrtve rata, a u cilju provođenja dosljedne socijalne politike i temeljem programskog principa solidarnosti i socijalne pravde, Ministarstvo potvrđuje svoje opredjeljenje podršci radu navedenih udruženja kroz, između ostalog, finansijsku podršku od strane tog ministarstva. Također, ovo ministarstvo je istaklo stav da je potrebno donošenje propisa kojim će se jasno utvrditi uslovi, kriteriji i postupak za sticanje statusa udruženja i fondacija od posebnog interesa za Kanton Sarajevo, kao i prava i obaveze koje iz tog statusa proizilaze.

Ministarstvo za boračka pitanja je u dostavljenom izjašnjenju, broj: 06-11-43147/25 od 17.09.2025. godine istaklo da je Skupština Kantona Sarajevo, dana 30.12.2022. godine donijela Odluku o proglašenju boračkih udruženja, organizacija i saveza od posebnog interesa za Kanton Sarajevo („Službene novine Kantona Sarajevo“, broj 2/23), i ukazalo je na sadržaj te Odluke kojom je jasno utvrđeno čemu doprinose udruženja i savezi koja čine Koordinacioni odbor boračkih organizacija Kantona Sarajevo od posebnog interesa za Kanton Sarajevo, i taksativno je navedeno koja su to udruženja, organizacije i savezi. Također je navedeno da jedan od kriterija za uvrštavanje boračkih udruženja među udruženja od posebnog interesa i značaja za Kanton Sarajevo je i da udruženja obuhvataju cjelokupnu teritoriju Kantona Sarajevo kao i taj što su u okviru Koordinacije boračkih organizacija Kantona Sarajevo obuhvaćene sve kategorije boračke populacije. Dalje je navedeno da je jedan od kriterija prenos javnih ovlaštenja na boračka udruženja na osnovu Odluke



Skupštine Kantona Sarajevo i Zaključka Vlade Kantona Sarajevo broj: 14-04-25536-1/22 od 07.07.2022. godine.

Ministarstvo je navelo da je na osnovu Odluke o utvrđivanju kalendara za obilježavanje značajnih događaja, datuma i ličnosti iz perioda odbrambeno-oslobodilačkog rata 1992-1995 na području Kantona Sarajevo donešene od strane Skupštine Kantona Sarajevo dana 26.03.2008. godine i Odluke o utvrđivanju kalendara značajnih događaja, datuma i ličnosti iz perioda narodno-oslobodilačkog rata 1941-1945 na području Kantona Sarajevo, donešene od strane Skupštine Kantona Sarajevo dana 29.04.2025. godine i Zaključka Vlade Kantona Sarajevo donijetog 18.12.2008. godine kroz stavove 2., 3., 4. i stav 19. u provođenju odluke gdje se Koordinacioni odbor boračkih organizacija Kantona Sarajevo obavezuje za aktivno učešće u organizovanju obilježavanja preko 75 značajnih događaja, datuma i ličnosti u Kantonu Sarajevo.

Ministarstvo za odgoj i obrazovanje je u svom izjašnjenju, broj: 11-02-04-43147-2/25 od 12.09.2025. godine, istaklo da je u odnosu na zastupničku inicijativu i argumentaciju da gradovi i općine već imaju regulisan ovaj institut kroz odluke ili pravilnike, mišljenja da za donošenje pravilnika ili drugog podzakonskog akta od strane ministarstva nema pravnog osnova, pri čemu je ukazano na odredbe Zakona o organizaciji organa uprave u Federaciji Bosne i Hercegovine („Službene novine Federacije BiH“, broj 35/05). Dalje je istaknuto da je Skupština Kantona Sarajevo ranije na prijedlog određenih ministarstava donosila pojedinačne odluke kojima su određena udruženja proglašavana od posebnog interesa za Kanton Sarajevo, te da to ministarstvo nije do sada donosilo ili predlagalo donošenje odluke o proglašenju određenih udruženja od posebnog interesa za odgoj i obrazovanje jer smatra da je dosadašnji pristup raspisivanja Javnog poziva za podnošenje prijave udruženja i neprofitnih organizacija za dodjelu sredstava za finansiranje/sufinansiranje programa/projekata/aktivnosti iz Budžeta Kantona Sarajevo sa pozicije Ministarstva za odgoj i obrazovanje u skladu sa normativnim okvirom osigurao visok stepen transparentnosti i javnosti, uz jasno propisane uslove te opće kriterije za dodjelu sredstava. Također, ovo ministarstvo je istaklo i mišljenje da bi donošenje posebnog propisa kojim bi se uredilo sticanje statusa od posebnog interesa za Kanton Sarajevo, nosilo i određene rizike prvenstveno u smislu obaveze planiranja i osiguranja određenog finansijskog iznosa u Budžetu za finansiranje programskih ciljeva te programa/projekata/aktivnosti navedenih udruženja.

Ministarstvo unutrašnjih poslova je dostavilo izjašnjenje, broj: 01-9-04-6040/25 od 23.09.2025. godine u kojem je obavijestilo ovo ministarstvo da izražava podršku navedenoj inicijativi jer smatra da je potrebno sistemski urediti ovu oblast kroz donošenje jasnog, preciznog, nedvosmislenog propisa kojim će se utvrditi transparentni kriteriji za sticanje statusa udruženja i fondacija od posebnog interesa za Kanton Sarajevo. Također se navodi da se poseban akcenat treba staviti na udruženja i fondacije koje se bave zaštitom i pružanjem podrške posebno ranjivim kategorijama društva, kao što su djeca, maloljetne osobe, žene, a koji su izloženi nasilju u porodici, osobe sa invaliditetom, starije osobe, pripadnici marginalizovanih i socijalno isključenih grupa, te da ove kategorije često nemaju adekvatnu zaštitu u okviru postojećih institucija sistema, te upravo organizacije civilnog društva često imaju ključnu ulogu u njihovom osnaživanju, zaštitu prava i pružanju direktne pomoći.

Ostala ministarstva Kantona Sarajevo nisu dostavila izjašnjenja na zastupničku inicijativu.

Nakon analize zastupničke inicijative, te razmatranja dostavljenih izjašnjenja ministarstava, ovo ministarstvo ističe sljedeće:

Kada je riječ o podršci radu neprofitnim organizacijama, na nivou Kantona Sarajevo donesena je Uredba o dodjeli transfera neprofitnim organizacijama i pojedincima iz Budžeta Kantona Sarajevo („Službene novine Kantona Sarajevo“, br: 22/21, 13/22, 21/24 i 10/25) (u daljem tekstu: Uredba) kojom su utvrđeni minimalni standardi dodjele budžetskih sredstava neprofitnim organizacijama putem transfera za finansiranje i sufinansiranje aktivnosti/programa/projekata. Uredba je donesena u skladu sa odredbama Zakona o izvršavanju budžeta Kantona Sarajevo, a u vezi sa federalnim propisima i to Zakonom o budžetima u Federaciji Bosne i Hercegovine („Službene novine Federacije BiH“, br: br. 102/13, 9/14, 13/14, 8/15, 91/15, 102/15, 104/16, 5/18, 11/19, 99/19, 25/22 i 7/25) i



Adresa: Reisa Džemaludina Čauševića 1, 71 000 Sarajevo
Tel: + 387 (0) 33 562-083, Fax: + 387 (0) 33 562-241
Web: <http://mpu.ks.gov.ba>, E-mail: mpu@mpu.ks.gov.ba

3/4

Zakonom o finansijskom upravljanju i kontroli u javnom sektoru u Federaciji Bosne i Hercegovine („Službene novine Federacije BiH“, broj 38/16), te su njome propisani opći i posebni uslovi i postupci koje davalac budžetskih sredstava treba primjenjivati prilikom dodjele sredstava iz Budžeta. Također, kao jedan od principa dodjele budžetskih sredstava propisan je princip zakonitog, namjenskog, transparentnog, efikasnog i ekonomičnog raspolaganja budžetskim sredstvima. Članom 6. Uredbe propisani su i izuzeci od njene primjene, tako da se ona ne odnosi na neprofitne organizacije i pojedince koji po osnovu posebnih zakona ostvaruju pravo na sredstva za finansiranje i sufinansiranje iz Budžeta, odnosno kojima je postupak dodjele sredstava propisan zakonskim ili podzakonskim aktom, ili odlukom Vlade Kantona Sarajevo, a što je u skladu sa Zakonom o izvršavanju Budžeta za tekuću godinu.

Iz izjašnjenja koja su dostavila gore navedena ministarstva je vidljivo da je Skupština Kantona Sarajevo u proteklom periodu donosila odluke kojima je za pojedine neprofitne organizacije utvrdila status od posebnog interesa za Kanton Sarajevo. Analizom tih odluka utvrđeno je da njihov sadržaj nije istovjetan kada je riječ o definisanju pojma „statusa od posebnog interesa“ i pravnih posljedica dodjeljivanja takvog statusa. Zbog navedenog, ovo ministarstvo smatra da se zastupnička inicijativa može smatrati opravdanom zbog potrebe da se propišu jasni i objektivni kriteriji, transparentne procedure kao i jasne pravne posljedice sticanja statusa od posebnog interesa za Kanton Sarajevo i druga pitanja od značaja za predmetno pitanje, a čime bi se dodatno doprinijelo pravnoj sigurnosti i stvaranju poticajnog okruženja za djelovanje neprofitnih organizacija u Kantonu Sarajevo.

U skladu sa odredbama člana 28. Zakona o Vladi („Službene novine Kantona Sarajevo“, broj 36/14 - Novi prečišćeni tekst i 37/14), Vlada Kantona Sarajevo kao organ izvršne vlasti Kantona Sarajevo, ovlaštena je da donosi uredbe kao opšte akte kojima se uređuju najvažnija pitanja iz nadležnosti Vlade Kantona, bliže uređuju odnosi za provođenje zakona, obrazuju stručne i druge službe Vlade Kantona i utvrđuju načela za unutrašnju organizaciju organa uprave Kantona. Imajući u vidu činjenicu da su odluke o utvrđivanju statusa udruženja od posebnog interesa za Kanton Sarajevo u nadležnosti Skupštine Kantona Sarajevo, ne postoji pravni osnov da Vlada Kantona Sarajevo donese propis koji je predložen inicijativom.

Shodno navedenom, propis kojim bi se definisali uslovi i način sticanja statusa udruženja i fondacija od posebnog interesa za Kanton Sarajevo, kao i prava i obaveze koje iz tog statusa proizilaze, kako je predloženo zastupničkom inicijativom morao bi biti donesen od strane Skupštine Kantona Sarajevo.

Naglašavamo da bi se pri donošenju takvog propisa u obzir morali uzeti propisi viših nivoa vlasti kojima je utvrđena dodjela budžetskih sredstava udruženjima i fondacijama, naročito propisi kojima se reguliše oblast budžetskog upravljanja, a kojima je propisana obaveza raspisivanja javnog konkursa/poziva za dodjelu budžetskih sredstava. Također, kriteriji i uslovi za sticanje navedenog statusa moraju biti utvrđeni spram svih relevantnih resora.

S poštovanjem,

Dostaviti:

1. Naslovu;
2. a/a.

